

दिनांक 08.06.2025

समय: 18.45 बजे

आकाशवाणी जयपुर-अजमेर
प्रादेशिक समाचार

व प्रधानमंत्री नरेन्द्र मोदी कयो-सरकार लारला 11 बरसां मांय देश री प्रगति मांय महिलावां री निर्णायक भूमिका तय करी।

व वंदे गंगा जल संरक्षण-जन अभियान रे तैत प्रदेशभर मांय श्रमदान अर जागरुकता गतिविधियां जारी।

व प्रदेश मांय गर्मी रो असर तेज-श्रीगंगानगर मांय पारो 47 डिग्री सेल्सियस रे पार।

व आकाशवाणी सेवा रा आज 90 बरस पूरा व्हा-बहुजन हिताय बहुजन सुखाय रा आदर्श रे साथे देश री 98 फीसदी आबादी ताई पहुंच बनायी।

000

प्रधानमंत्री नरेन्द्र मोदी कह्यो है के भारत ने विकसित बनावण मांय नारी-शक्ति री परिवर्तनकारी भूमिका व्हेला अर इण कारण सरकार लारले 11 बरसां सूं महिलावां रे नेतृत्व माथे बत्ती ध्यान दे री है। वणा कयो कि विज्ञान, शिक्षा, खेलकूद, स्टार्ट-अप अर सशस्त्र बल, हर खेतर मांय महिलावां चोखो प्रदर्शन कर र दूजां खातिर प्रेरणा-स्रोत बण री है।

राष्ट्रीय जनतांत्रिक गठबंधन-एनडीए सरकार रा 11 बरस पूरा होवण रे मौके माथे सोशल मीडिया पोस्ट मांय प्रधानमंत्री कयो कि एनडीए सरकार विकास मांय महिलावां री सशक्त भूमिका खातिर खास पहल करी है। इण मांय स्वच्छ भारत अभियान, जन-धन खातां रे ज़रिए वित्तीय समावेशन अर ज़मीनी स्तर माथे महिलावां रो सशक्तिकरण करणो भेळो है। श्री मोदी कयो के उज्ज्वला योजना सूं घरां ने धुआं-मुक्त बणाणे मांय मदद मिली है।

प्रधानमंत्री कह्यो के मुद्रा ऋण सूं लाखों महिलावां खातिर उद्यमी बणणे रो सुपणो पूरो व्हीयो है। प्रधानमंत्री आवास योजना रे तैत महिलावां रे नाम माथे मकान लेणे रे प्रावधान सूं महिलावां मांय सुरक्षा अर सशक्तिकरण री भावना बढ़ी है। श्री मोदी **बेटी बचाओ-बेटी पढ़ाओ** अभियान ने बालिका संरक्षण रो राष्ट्रीय अभियान बतायो।

प्रदेश मांय भी केन्द्र सरकार री जन कल्याणकारी योजनावां सूं घणी तादाद मांय किसान, युवा, महिला समेत न्यारा-न्यारा वर्ग लाभान्वित हो रिया है। सवाईमाधोपुर निवासी जयदीप सिंह राजावत **प्रधानमंत्री सूर्य-घर-योजना** ने खासो उपयोगी अर लाभदायक बतायो। इण योजना ने वणा जनकल्याणकारी योजना बताता थकां प्रधानमंत्री रो आभार जतायो।

000

प्रदेश मांय न्यारी-न्यारी ठोडां माथे वंदे गंगा जल संरक्षण-जन अभियान रे तहत जल संरक्षण खातिर न्यारी-न्यारी गतिविधियां राखी जा री है। इण ई कड़ी मांय बालोतरा रा सिवाना गांव मांय आज प्रभात फेरी निकाळी ज्यी। इण मौके माथे स्थानीय लोग तालाब माथे श्रमदान कर पाणी बचावण रो संदेश दियो। कोटपूतली-बहरोड जिला रा विराट नगर खेतर मांय पर्यावरण संरक्षण, वर्षा जल संरक्षण अर स्वच्छता सूं जुड़योडा न्यारा-न्यारा कार्यक्रम राख्या गया। इण मौके माथे निकाळी ज्यी रैली रे माध्यम सूं लोगां ने पाणी अर पर्यावरण बचाणे रो संदेश दियो। जैसलमेर मांय अभियान रे तैत आज जिला प्रशासन री कानी सूं सर्किट हाउस मांय श्रमदान कार्यक्रम राख्यो गयो। झालावाड़ मांय न्यारा-न्यारा महकमा अर संगठन जल स्रोतां री सफाई करी। इण रे चालता जनजागरूकता रैली अर संवाद कार्यक्रम भी राखीज्या। सीकर मांय वंदे गंगा जल संरक्षण-जन अभियान रे तैत प्राचीन जल स्रोतां रे संरक्षण रे साथे-साथे पर्यावरण संरक्षण अर स्वच्छता रो काम भी कर्यो जा रियो है। आज माधव सागर तळाब मांय नगर परिषद रा अहलकार अर कर्मचारी साफ-सफाई करी।

000

मुख्यमंत्री वृक्षारोपण महाअभियान अर हरियालो राजस्थान रे तैत डीग जिले मांय पौधारोपण रो सिलसिला जारी है। वन महकमा री नर्सरी मांय तैयार करया पौधा एक जुलाई सूं आमजन, शिक्षण संस्थान, स्वयं सेवी संगठनां, सरकारी अर गैर-सरकारी संस्थावां ने तैय दरां माथे दिया जावेला। और ब्यौरो म्हाणा खबरनवीस सूं -

000

लोकसभा अध्यक्ष ओम बिरला काले जोधपुर प्रवास माथे रहवेला। वे आईआईटी जोधपुर परिसर मांय बण्या नुवा व्याख्यान कक्ष रो उद्घाटन करेला। 14 करोड़ 80 लाख रुपया री लागत सूं बण र तैयार व्हीयो ओ भवन अत्याधुनिक सुविधावां सूं युक्त है। इण रे चालता वे 'रिसर्च इनिशिएटिव ग्रांट' रो भी वितरण करेला। इण सूं शोधकर्तावां अर नवाचार सूं जुड़ी परियोजनावां ने खासो प्रोत्साहन मिलेला। साथे ही, वे संस्थान री नुवी आधिकारिक वेबसाइट रो लोकार्पण भी करेला।

000

प्रदेश मांय तेज गर्मी रो दौर फेरु सरु व्हे ग्यो है। सात सूं बेसी जिलां मांय आज बत्ती ऊं बत्ती तापमान 45 डिग्री सेल्सियस सूं ऊपर दर्ज कर्यो गयो। सब सूं बत्ती 47 दशमलव 4 डिग्री सेल्सियस तापमान श्रीगंगानगर मांय रियो। बीकानेर मांय 46 डिग्री, बाड़मेर मांय 45 दशमलव 9, चूरु मांय 45 दशमलव 6, फलोदी मांय 45 दशमलव 4, जैसलमेर मांय 45 दशमलव 2 अर कोटा मांय 45 डिग्री सेल्सियस तापमान दर्ज कर्यो गयो। चूरु, भरतपुर, पाली, कोटा अर बारां साथे न्यारा-न्यारा जिलां मांय झुलसा देवण वाळी तेज गर्मी सूं जनजीवन प्रभावित व्हीयो है।

आज गर्मी रे कारण बाजारां मांय सन्नाटो पसरो निजर आयो। म्हाणा बाड़मेर खबरनवीस बतायो कि जिला मांय भीषण गर्मी, लू रा थपेड़ां सूं जनजीवन माथे घणो असर देखण ने मिल रियो है।

मौसम केन्द्र जयपुर रे मुजब आज अर काले बीकानेर अर श्रीगंगानगर साथे कुछेक जिलां मांय हीटवेव री स्थिति बणी रेहवेली। तापमान मांय दो डिग्री ताई बधोतरी व्हे सके है। 10 जून ताई कुछेक शहरां मांय बत्ती ऊं बत्ती तापमान 46 डिग्री सेल्सियस या उण सूं भी ऊपर होवण री आस है।

000

अंतर्राष्ट्रीय योग दिवस रे मौके माथे आकाशवाणी जयपुर रा क्षेत्रीय समाचार एकांश री कानी सूं संदेश श्रृंखला चलाई जा री है। इण मांय आज सुणो सीकर जिले री योग विशेषज्ञ रजनी प्रभा रो संदेश। आं रो कहणो है कि योग मनुष्य ने स्वस्थ राखण मांय सहायक है।

योग रो प्रशिक्षण ले रिया राकेश गिरी बतायो कि योग शारीरिक अर मानसिक रूप सूं फिट राखणे मांय सहायक है।

000

आकाशवाणी आज आपरी सेवा रा 90 बरस पूरा कर लिया है। बरस 1936 मांय 8 जून ने आज ही रे दिन भारतीय राजकीय प्रसारण सेवा रो नाम बदळ र ऑल इण्डिया रेडियो कर्यो गयो हो। ओ देश रा सांस्कृतिक, सूचना अर प्रसारण इतिहास मांय एक ऐतिहासिक क्षण हो। स्वतंत्रता रे पाछे एआईआर रो तेजी सू विस्तार व्ही अर 1956 मांय ई ने आकाशवाणी नाम दियो गयो। आज आकाशवाणी 591 स्टेशनां रो संचालन करे है जका भारत री 98 फीसदी आबादी ताई 23 भाषावां अर 146 बोलियां मांय प्रसारण करे है। आकाशवाणी रो विदेश सेवा प्रभाग सौ सू भी बत्ती देशां मांय भारत री आवाज ने विश्व स्तर माथे प्रसारित करे है। बहुजन हिताय बहुजन सुखाय रे आपरे आदर्शां माथे चालता व्हीया आकाशवाणी रो समाचार सेवा प्रभाग देश रा नागरिकां ने नुवी सूचनावां अर विश्वसनीय खबरां पहुंचा रियो है।

000

गुर्जर आरक्षण संघर्ष समिति कानी सू आज भरतपुर रा पीलूपुरा गांव मांय राखीजी महापंचायत रे पाछे लोगां दिल्ली-मुंबई रेलवे ट्रैक ने जाम कर दियो। वणा कोटा-मथुरा पैसेंजर ट्रेन ने भी रोक्यो। इण सू केई दूजी रेलगाड़ियां भी प्रभावित व्ही। महापंचायत मांय राज्य सरकार री कानी सू मांगां ने लेर ड्राफ्ट भेज्यो ग्यो हो, जिण ने संघर्ष समिति रा अध्यक्ष विजय बैसला पढ़ र सुनायो। मांगां माथे सहमति नी बणणे पर ट्रैक जाम कर्यो ग्यो। पुलिस अर प्रशासन रा अहलकार अबार गुर्जर समाज रा नेतावां सू बातचीत कर रह्या है। हालात ने देखता थकां पीलूपुरा रे आसे-पासे सुरक्षा रा पुख्ता इंतजाम कर्या ग्या है।

000

कोटा जिला मांय आज न्यारी-न्यारी दुर्घटनावां मांय चार जणां री मौत व्हे ग्यी। शहर रा डीसीएम खेतर मांय एक बेकाबू कार मोटरसाइकिल अर साइकिल सवार ने टक्कर मार दी। हादसा मांय मोटरसाइकिल सवार री मौत व्हे ग्यी। वठी ने साइकिल सवार घायल हो ग्यो। एक दूजा हादसा मांय नयापुरा खेतर मांय ई-रिक्शा पलटणे सू एक बालिका री मौत व्हे ग्यी। इण रे अलावा सांगोद खेतर मांय करंट लागणे सू एक मोट्यार री मौत व्हे ग्यी। वठी ने सीढ़ियां सू फिसलणे सू भी एक कोचिंग छात्र री मौत व्हे ग्यी। मृतक छात्र मध्यप्रदेश रे विदिशा रा रेहवासी हा।

000

केन्द्रीय स्वास्थ्य मंत्री जे.पी. नड्डा सुरक्षित अर स्वास्थ्यवर्धक खानपान रे माध्यम सू मोटापो रोकणे रे जागरूकता अभियान री सुरुआत करी है। ओ अभियान भारतीय खाद्य संरक्षा अर मानक प्राधिकरण री कानी सू सुरु कर्यो गयो है। विश्व खाद्य सुरक्षा दिवस जळसे रे मौके माथे केन्द्रीय मंत्री कयो कि स्वस्थ समाज सू ही सशक्त राष्ट्र बण सके है। वणा लोगां सू संतुलित आहार रो सेवन करणे रो हेलो कर्यो। केन्द्रीय मंत्री बतायो कि भारतीय चिकित्सा अनुसंधान परिषद रा अध्ययन मांय पतो चाल्यो है कि शहरी खेतरां मांय मोटापे री समस्या 39 फीसदी अर ग्रामीण खेतर मांय 23 फीसदी बध ग्यी है। ऐडा मांय आपरे खान-पान री आदतां मांय बदलाव करणो व्हेला।

000

भारतीय डाक महकमो राज्य रा पश्चिमी खेतर मांय 20 जून ने क्षेत्रीय डाक अदालत रो आयोजन करेला। अ अदालतां जोधपुर, सिरोही, पाली, जैसलमेर, नागौर, बाड़मेर, जालोर, चूरू, बीकानेर, श्रीगंगानगर अर हनुमानगढ़ जिलां मांय लगाई जावेली। सहायक निदेशक डाक सेवा बतायो कि उपभोक्ता डाक सेवावां सू जुड़योडी शिकायतां खातिर 13 जून ताई अर्जी दे सके है।

000

राजस्थान आवासन मण्डल री कानी सूं सरू करीजी नुवी आवासीय योजनावां खातिर अर्जी देवण री आखिरी तारीख 11 जून है। आं योजनावां रे तैत न्यारा—न्यारा आय वर्ग खातिर जयपुर, धौलपुर, बारां अर बूंदी मांय फ्लैट्स अर स्वतंत्र आवास मुहैया कराया जा रिया है। जयपुर रा प्रताप नगर अर मानसरोवर मांय पार्किंग सुविधा रे साथे फ्लैट्स मुहैया करवाया जा रिया है। वटी ने बारां री गजनपुरा आवासीय योजना, बूंदी री लाखेरी आवासीय योजना अर धौलपुर री बाड़ी रोड माथे स्वतंत्र आवास मुहैया कराया जा रिया है। आं योजनावां मांय आमजन रे **सपनों का आशियाना** प्रचलित बाजार दरां री तुलना मांय बेहद किफायती दरां माथे मुहैया है। इण मांय आवेदन प्रक्रिया भी सरल अर पारदर्शी राखी गई है।